

Ո Ր Ո Շ ՈՒ Մ

Ճանապարհային ոստիկանության վարչական տույժ նշանակելու մասին
18.07.2023թ. թիվ 2316743620 որոշումը բեկանելու և վարչական իրավախախտման
վերաբերյալ գործի վարույթը կարճելու մասին

<< 11 >> 10 2023թ. 7-13 10530

ք.Երևան

Ճանապարհային ոստիկանության պետ, ոստիկանության գնդապետ
Ն.Սարգսյանս, վերանայելով Շահանե Ստեփանյանի ՄԴ/81293-23, ՄԴ/81316-23
նույնաբովանդակ դիմումների քննարկման արդյունքում ստեղծված նյութերը՝

Պ Ա Ր Զ Ե Ց Ի

Երևան քաղաքի Արաբկիր վարչական շրջանի Կիևյան փողոցի 30 շենքի 34
բնակարանի բնակիչ Շահանե Ստեփանյանը դիմումներով խնդրել է բեկանել
Ճանապարհային ոստիկանության վարչական տույժ նշանակելու մասին թիվ
2316743620 որոշումը՝ հայտնելով իր անհամաձայնությունը կայացված որոշման
վերաբերյալ, ինչպես նաև խնդրել է ետ վերադարձնել վճարված գումարը:

Դիմումի քննարկման արդյունքում պարզվել է, որ վիճարկվող որոշումը ենթակա է
բեկանման հետևյալ պատճառաբանությամբ.

<<Վարչարարության հիմունքների և վարչական վարույթի մասին>> օրենքի 37-րդ
հոդվածի 1-ին մասի համաձայն՝ վարչական մարմինը պարտավոր է ապահովել
փաստական հանգամանքների բազմակողմանի, լրիվ և օբյեկտիվ քննարկումը՝
բացահայտելով գործի բոլոր, այդ թվում՝ վարույթի մասնակիցների օգտին առկա
հանգամանքները:

<<Տեսանկարահանող կամ լուսանկարահանող սարքերով հայտնաբերված
ճանապարհային երթևեկության կանոնների խախտումների վերաբերյալ գործերով
իրականացվող վարչական վարույթի առանձնահատկությունների մասին>> օրենքի 3-
րդ հոդվածի 1-ին մասի համաձայն՝ վարչական վարույթի իրավախախտման
հատկանիշների պարզման փուլում իրավախախտումը հիմնավորող ապացույցը
իրավախախտումն ամրագրած **տեսանյութն է կամ լուսանկարը**, որը պարունակում
է նաև տեխնիկական միջոցով արձանագրված տվյալները: Ըստ նույն հոդվածի 2-րդ
մասի՝ որպես իրավախախտումը հիմնավորող ապացույց վարչական կամ դատական

կարգով բողոքարկման վարույթում կարող են օգտագործվել Վարչական իրավախախտումների վերաբերյալ Հայաստանի Հանրապետության օրենսգրքի 251-րդ հոդվածով նախատեսված ապացույցները:

Վարչական իրավախախտումների վերաբերյալ ՀՀ օրենսգրքի 251-րդ հոդվածի 1-ին մասի համաձայն՝ վարչական իրավախախտման վերաբերյալ գործի ապացույցներ են համարվում ցանկացած այն փաստական տվյալները, որոնց հիման վրա օրենքով սահմանված կարգով մարմինները (պաշտոնատար անձինք) հաստատում են վարչական իրավախախտման առկայությունը կամ բացակայությունը, տվյալ անձի մեղավորությունը այն կատարելու մեջ և գործի ճիշտ լուծման համար նշանակություն ունեցող այլ հանգամանքներ: Ըստ նույն հոդվածի 2-րդ մասի՝ այդ տվյալները հաստատվում են հետևյալ միջոցներով՝ վարչական իրավախախտման վերաբերյալ արձանագրությամբ, վարչական պատասխանատվության ենթարկվող անձի բացատրություններով, տուժողի, վկաների ցուցմունքներով, փորձագետի եզրակացությամբ, իրեղեն ապացույցներով, իրեր և փաստաթղթեր վերցնելու վերաբերյալ արձանագրությամբ, ինչպես նաև այլ փաստաթղթերով:

<<Վարչարարության հիմունքների և վարչական վարույթի մասին>> ՀՀ օրենքի 63-րդ հոդվածի 1-ին մասի համաձայն՝ անվավեր է առ ոչինչ չհանդիսացող այն ոչ իրավաչափ վարչական ակտը, որն ընդունվել է՝

ա) օրենքի խախտմամբ, այդ թվում՝ օրենքի սխալ կիրառման կամ սխալ մեկնաբանման հետևանքով:

բ) կեղծ փաստաթղթերի կամ տեղեկությունների հիման վրա, կամ եթե ներկայացված փաստաթղթերից ակնհայտ է, որ ըստ էության պետք է ընդունվեր այլ որոշում:

գ) շահերի բախման իրավիճակում:

Ճանապարհային ոստիկանության վարչական տույժ նշանակելու մասին վերը նշված որոշմամբ արձանագրված իրավախախտումն ամրագրած տեսանյութի մանրակրկիտ ուսումնասիրության արդյունքում, ինչպես նաև Ճանապարհային ոստիկանության ճանապարհային երթևեկության կազմակերպման հսկողության բաժնի կողմից տրված տեղեկանքի հիման վրա հիմնավորվել է, որ վերը նշված որոշումը ենթակա է բեկանման:

Վարչական իրավախախտումների վերաբերյալ ՀՀ օրենսգրքի 296-րդ հոդվածի համաձայն՝ վարչական իրավախախտման վերաբերյալ գործի կարճումով որոշումը բեկանելը առաջ է բերում գանձված դրամական գումարների, հատուցմամբ վերցված և բռնագրավված առարկաների վերադարձում, ինչպես նաև նախկին որոշման հետ կապված սահմանափակումների վերացում:

Ելնելով վերոգրյալից և ղեկավարվելով <<Վարչարարության հիմունքների և վարչական վարույթի մասին>> ՀՀ օրենքի 65-րդ հոդվածի 1-ին մասով, ինչպես նաև Վարչական իրավախախտումների վերաբերյալ ՀՀ օրենսգրքի 247-րդ հոդվածի 1-ին մասի 1-ին կետով և 293-րդ հոդվածի 1-ին մասի 3-րդ կետով՝

Ո Ր Ո Շ Ե Ց Ի

1. Ճանապարհային ոստիկանության վարչական տույժ նշանակելու մասին 18.07.2023թ. թիվ 2316743620 որոշումը բեկանել և վարչական իրավախախտման վերաբերյալ գործի վարույթը կարճել.
2. Վերադարձնել Ճանապարհային ոստիկանության վարչական տույժ նշանակելու մասին թիվ 2316743620 որոշմամբ նշանակված վարչական տուգանքի վճարված գումարը.
3. Սույն որոշումն ուժի մեջ է մտնում հանձնելու օրվան հաջորդող օրը և կարող է բողոքարկվել ՀՀ վարչական դատարան՝ օրենքով սահմանված կարգով և ժամկետներում.
4. Սույն որոշման օրինակն ուղարկել Շահանե Ստեփանյանին և **ՃԲ Ֆինանսական բաժանմունք:**



Կատարող՝ Տ. Մարգարյան
Հեռախոս՝ 060-83-84-02